

四庫全書

集部

欽定四庫全書

集部

山谷別集卷十八至二十

詳校官庶吉士臣胡鉅

檢討臣何思鈞覆勘

總校官進士臣朱鈐

校對官編修臣勵守謙

謄錄監生臣趙壽南

欽定四庫全書

山谷別集卷十八

宋 黃庭堅 撰

書簡

答黔州陳監押書二

陳名傑斌  
老即其子

某再拜奉別遂二十許月通書不數懷仰則勤九月末  
屈殿直方送春初所惠書來皮子皆蟲損瀟戎往來之  
人如織此君乃慢事如此雖然亦足觀公於不肖之勤

也承邇來王事不至勞瘁閣中清健賢郎不廢學開慰  
無量聞賈使君明快解事宋倅遂全安想郡政殊辦時  
有歌舞之會對江山否斌老才格甚不凡所恨相遠不  
能取來此讀書如旁近乞局先生難使之長育人材爾  
向嘗干王補之為公措置一差遣不意此公遂如此俟  
新帥到試更圖之不知閣中能令遠來此讀書否見讀  
書人稚鈍資質下劣未嘗不思斌老之明利卓立也未  
緣參承臨風懷仰千萬清修不懈自壽

某頓首承賢郎讀書作詩寫字皆日進甚慰久別之意  
恨相遠無緣致琢磨之功惟深念金玉之質可惜虛過  
歲月且四十鈍拙如初但不廢書耳王補之小疾遂不  
起令人哽塞觀其意氣殊未衰不謂遽止此也摩圍閣  
尚掃除否新雙井數兩可用蘆心揉篩去白毛細磴用  
嫩湯點可攜就摩圍煮涪翁井泉也

與斌老書二

斌老累得書喜侍奉吉慶讀書不懈黔中難得師友惟

可閉門自讀書古人云讀書百遍其義自見惟要不雜學悉心一緣義理之性開發但以韓文為法學作文字且不用作時文經義之類如此等物若修學成看大學經義三五日便可成就有餘也草書水墨之類且置之勿作亦妨人讀書全功劉斯立清修節行甚美可與游從恨渠遂隨計入都耳左傳前漢讀得徹否書不用求多但要涓涓不廢江出岷山源若甕口及其至於楚國橫絕千里非方舟不可濟惟其有源而不息受下流多

故也既無人講勸但焚香正坐靜慮想見古人自當心  
源開發日勝進也今寄王獻之黃庭經張長史草書千  
字可觀古人用筆之意

斌老夏熱想侍奉吉慶別來極奉思也即日必在孫逢  
原會學處此老人勤學穩實依之為有理然常須自存  
心見賢思齊焉見不賢而內自省也如相聚終日作無  
義語及無益事切自儆戒勿為所黨可惜少年才器可  
致遠大一墮此朋中如入鮑魚之肆十年尚猶有臭也

偶得楊仲筆似可用謾寄十枝戎州有所須因書示諭  
四十道中廢書已曉成一崑崙矣

右已見  
石刻

與元聿聖庚書六

某叩頭聖庚贊府年家欽仰問學存心之美恨相得晚  
也辱君子以王事來不但邑里鰥寡之慶吾儕得聞緒  
餘之益何慰如之下車未幾先屈臨慰恭然在衰削之  
中無階致敬謹勒參候哀羸不次

某叩頭上子舍進德不怠恨未識面也寒煖不節起居



何如承教惠示道中佳句想見京洛江湖之遊無日不  
在文字間曹公常歎盛孝章老大不廢學今觀公詩恨  
曹劉不相待爾子舍詩文遂能如此元氏代不乏人矣  
欽歎欽歎阻面但有馳情

賢郎議論高遠與翰墨相稱想其退而閒居必有以自  
樂之也岷山之水濫觴及其成江橫絕吳楚涵受百谷  
以深其原本故也學而知本者蓋可求師友於書冊矣  
伏奉手誨存問勤篤恭審尊候康勝良慰懷仰累日獨

居山堂氣體少得蘇息但時苦賓客擾人爾惠示手編  
元祐錄頗有所發前後序筆力老硬甚激疲懦且借留  
傳本別紙云送示陶淵明畫像未至也損藁杖荷扶將  
之意白直且不須缺人亦不敢自外於左右不伐進學  
無恙不果別狀

前日諸公惠訪甚慰幽居岑寂辱手誨審起居住佳勝所  
示歸舟唱和與雪月爭光可也欽歎欽歎謹勒參候  
蒙示先大人唐詩詞氣深厚有志於天下而無公卿之

命者也須鄙文以表於墓敢不承命

乾元用九天地生物之始君子思所以與天地參者其在遠識宏度進德不怠與時俱休某歲前定過海昏若水太澀即作乘陸計爾會面有期尚冀調護惠詩不與在西安時同律豈吏責不繁又獲山水之助耶欽重欽重

與元勛不伐書九

勛聖庾之子自元祐初從山谷遊幾二十年終春陵太守

某叩頭不伐足下相簡願見有日比承自屈所見過於

所聞矣書詞稱引所推擬太高若某者安能如是盛意  
不可虛辱請誦所從來而足下擇焉不肖蚤從李公擇  
孫莘老遊稍知自重而已適於四方得交數公蒙琢磨  
之益僅能不溺於流俗爾學問既少記憶早衰緝綴翰  
墨粗能達意至於作詩蓋童子雕篆之流少而好之晚  
不能休而先達蘇子瞻猥見題品以為絕倫鄙心實不  
堪以為能故數年來病眩因不復作也若乃見已與道  
同體俛仰於萬物之中而常為之宰不肖則安能自當

求於世之有道者耳雅聞足下父子涵俗而志剛居今而好古學問文章下足與今之人並時上足以配元氏之作者而愀然憂不能退然謝無有捆載而乞於垂橐之車豈能有以加益然有一於此今之君子好以文章輕重人自是千慮之一失最能溺後生願足下鈎其深而勿游其瀕也至於知言之不二知至誠之無息足下不但能言之願相與講學推之行事歲晚望効焉  
忽忽累日不能往記惟有馳想比辰伏惟侍奉外起居

勝常承問學不懈何慰如之所作賦殊進更少加尺寸功可以橫行場屋中矣賦語要深切著明不欲一句閒慢譬如善舞者刻刻出拍桓爾吳生與衆工同用筆墨而獨能妙者以下筆便能寫物之情性爾如不伐作詩已深此蹟但舉此加諸彼而已阻面故覩縷如此

暑雨異常伏想起居佳勝所示溫公讀書真是讀書法涉獵百篇不如深考一卷耳韻對平生不喜此書故未能有御史臺記希文借去未還耶納書府杜詩未嘗注

時因所見疏其上纔數十事耳所示書殊清壯若足下之詩視今之學詩者若吞雲夢八九於胸中矣如欲方駕古人須識古人闊狹乃可下筆今代少年能學詩者前有王逢原後有陳無已兩人而已文章無他但要直下道而語不脛俗耳

辱書審侍奉吉慶早以自牧君子所以首出庶物者也精於一則不凝滯於物鞭其後則無內外之患胸次寬則不為喜怒所遷人未信則反聰明而自照顏淵曰舜

何人哉隰朋愧不若黃帝夫設心若此豈暇與俗爭能哉竊窺足下有強學之志故及之耳

比歲在黔中嘗以詩及桃竹杖奉好時今君承尊公已解官去書及杖但留雙井舍中耳滑井劉君既至瀘渠以官所生熟夷因攻掠遂以書來道不能至轅道之意送所寄書及詩粲然一笑如在南山雲巖之間相從也詩日奇秀知別來不懈於問學如此勝進歡喜無量想他文皆如是恨不俱來也所諭家才四壁應舉蹉跎貧



者士之常富貴在天安可以人力計較耶知寸心不與萬物俱盡則在此不在彼矣千萬開拓胸次以天地為重求舜禹比肩則衡門之下古人不遠

元明近赴越州司理匠師在揚州守家爾知命挾雌將雛下荆峽迎元明未得近音也文章殊不能下筆蓋才智與齒髮俱衰憂患與病又侵其半所謂吾猶昔人也  
有放浪石刻數種亦可以見其衰颯散誕矣小子相今年已十七誦書雖多終未能決得古人義味近喜作古

詩他日或有一長爾未可量也

辱手誨審所苦脫然輕愈侍奉萬福何慰如之兩日亦  
聞尊府當之富水考試故不敢奏記耳淵明詩三冊今  
遣去楚詞校讎甚有功常苦王逸學陋無補屈宋欲尋  
一解寫字人令錄一本正文時時玩之病未能耳字說  
但苦盛熱嬾

每承惠問輒累幅似不必爾頃收得尹師魯范文正歐  
陽文忠謝希深數公皆可寄千里者細字一幅爾既為

相與親密削去流俗苟相取下之意又省材惜費之道也平時讀前漢不審生熟若未熟可日觀一卷并注精讀有不解者別以葉子記之殊勝泛讀失寸陰耳更慎冷物及夜中護腹山間霧氣喜侵人守身如城守氣如瓶乃安樂法

累日欲遣人致問常苦舍中有賓客事暑雨不穎脫體力佳否想侍奉萬福治行有涯否紙三種漫往作草茶四品恐須攜向北方耳山堂對新篁終日水聲潺潺殊

足思也

右皆得之  
元氏家藏

與馮才叔機宜書四

某再拜聞大帥出按西融不審旌旆參幕府否方此畏暑道途亦良勤宜州人袁端居處與竝隣有幹事材欲軍前一試其能然聞此行但與懷遠軍城砦耳如此則用人不多此人云但得達姓名於帥府他日或聽驅使耳其人能否固不逃於水鏡之前也邵普義用心耿介喜讀書與人有終始不獨嶺南士大夫中難得也方欲

達姓名以補麾下之闕竊聞詣幕府已有渝被用之意甚喜慰也河池久不得人若邵君一振其弊遠民實受察遠照微之賜率易冒聞想大府所患不得人耳

頃頻奉起居之敬不審皆得徹几下否承軒蓋從軍中之麾在懷遠伏想帷幄尊俎折衝千里動靜勝俗普義邵侍禁自軍前回辱朋酒之貺甚副所闕承賢郎亦從于邁盛暑居新市中亦煩暘耶某涉夏來幸頑健伯氏已之南豐永州兒姪輩近得安問未獲瞻承惟有懷仰

伏祈善眠食自重

平時於左右之心未嘗不勤而筆墨不在眼前又無經過之便亦恐士大夫之常情畏竄逐之人音問至前故極簡闕比時有親舊求書至門下輒修動靜之敬惟君子有常度不以前疎後數為黷也盛暑可畏又師衆聚新城中人氣鬱蒸於養生之理倍費調持不審寢膳勝常否令嗣計安勝不肖今年來氣體差勝去年亦金石藥裨衰殘幸無他也未緣瞻望馳情無已伏祈自重以

須陞擢

伯氏元明恐過冬至當來道出桂林計當獲參承也鄉  
隣人太醫王君慨云於左右有一日之雅其子秉宜州  
以闕使臣令押金陵駐泊迴其家方辦嚴欲向融州居  
到桂即望發遣幼吾幼以及人之幼想必垂意恃相照  
恩如骨肉故及此耳

與馮當時書

某頓首辱書恩意千萬審侍奉萬福為慰伯氏道出桂

林極荷公父子調護感刻不可言也來人懇求歸燭下  
作此書晁晁似欲不可讀點藥數品幸垂意一一疏示  
藥價也送藥人來當更寫一卷字去餘具載熙書言公  
字紹先與名不叶今奉字曰當時漢書云無說詩匡鼎  
來鼎當也言匡衡當來耳古人云當其可之謂時感時  
不可失也尚阻面會千萬珍重

與黨伯舟帖七

辱手筆承侍奉吉慶為慰棗極副所闕蘆鴈箋板既就



殊勝須尋得一水精或玉搥乃易成文耳竹卓子荷垂  
意繼得二簡荷不外之意墨亦多為人索去此二墨極  
堅黑墨惟換新水磨得墨多宿水則墨不磷也枕屏漫  
寫去陰寒少思不能佳

辱手誨喜承侍奉萬福臘糟荷垂意千秋木佳物也當  
寄融州作琴軫并可得數軸頭也公書字自有宿習要  
須勤觀魏晉人書帖日臨寫數紙便當頓進與古人爭  
功耳聞令弟亦自有筆力頗喜學否

錫燈檠極便用荷垂意也昔文字每煩調護餘尚有三  
二十冊若臘中趣得起當亦一佳事耳欲擣二十冊子  
紙不知郡中有大擣帛石否燈檠雖荷副所乏夜來試  
用觀書殊不愜老眼此乃照歌舞之器耳欲煩指揮別  
作一枚高七寸盤闊六寸足作三鴈足不須高受盞圈  
徑二寸半盞面三寸著柄盞傍作小圈如釵股屈之鴈  
足燈漢宣帝上林中燈制度極佳至今士大夫家有之  
古者燈盞皆有短柄沈約四聲云燈盞柄曲是也作成

當自優與價却納前一枚去

甲子雷雨深慰民望乃尊公清靜憂民之應欽歎欽歎  
暑氣未解計復大作雨當了此下種插秧事爾

辱手誨喜承侍奉吉慶錫合如法已付融州人行矣備  
急方俵背甚有功遂得一夏觀覽非小補也比頗得暇  
觀法帖否唐林夫作一臨書卓子中有抽替卓面兩行  
許地抽替中置燈臨寫摹勒不失秋毫知此制度否公  
書字已佳但疑是單鈎肘臂著紙故尚有拘局不放浪

意態耳但熟視法帖中王獻之書當自得之牋板但喜其簡裁未必工也大槩書字楷法欲如快馬斫陣草法欲左規右矩此古人妙處也

借示琴甚惠桐木太厚聲不清遠頭長尾太高非佳製也大琴而聲不出尾可謂拙工矣欲合李惇裕木香丸令人桂州買木香未來或有且借一兩

有人餽此二種筆差勝各分上兩枝須滌研磨墨待松花自泛乃以染毫則得筆力耳

承惠新頌三篇極歎用心精苦也然詩頌要得出塵拔俗有遠韻而語平易不知曾留意尋此等師匠楷模否

與馬忠玉書四

某再拜啟私居多故又伯氏方自都下來歸故匆匆不能作記承動靜閨餘溽暑即日尊候何如伏惟齋閤燕居八州無不得職明神相之百福所會頗復與諸公共登臨之樂否某蒙恩假守宣城實出獎借之賜方圖一走節下謹勒手狀

某再拜啟府中潭潭不異逆旅風雨驟冷擁被不溫乃  
能降伏心意眠枕晏然欽歎欽歎舟次大風簸船凡動  
物皆嘔吟達旦時時驚眠亦有斷維折柁之憂今旦既  
不可出擁爐假寐亦自不惡翹叟亦擇日出居乃是荆  
南人毛病明日陰雨往往復還家作客矣亦聞澧州已  
食筍方作書從小禮求之饋犁祁感感刻刻器之到當  
入城參候也

有江州王寅者清靜寡欲忠信好義犯而不校久與之

游見其學行日進不聞其有過也昨登第以兩房孤遺  
待其祿而食故授齊州司理今為見闕以江州無船輒  
欲乞一舟於節下以不肖於左右有一日之雅遣人來  
借一言已報之云馬公特達好賢如足下之清修重慎  
見而可知足下但自往求之不審嘗至門下否

某缺然久不作記每見祠部丈知動靜以為慰遠蒙手  
教存問勤懇并惠寄紀年通譜極荷眷與不忘承二制  
人饑得使者勞來不怠疲瘵當少蘇今頗得雨澤稍餉

及時否餘杭佳太守想得極意湖山之間時有佳句否  
某自頃以親老多小不快於今未能輟醫藥又足弱脅  
痛艱於下榻強顏班行中公私事多曠但未得雍容江  
湖之上不忘鑒寐也臨書起望東南曷勝馳情千萬為  
國自重須褒寵以慰親庭謹奉狀

與子中知縣書

某再拜哀疚之餘荒廢文字故承命久不就屢煩問訊  
愧悚愧悚今率爾為此不知堪入石否公富於春秋好



學不倦想不厭聞切磋之言顧所聞淺陋不足發揮盛  
美耳或可入石但得十數本墨本惠示足矣

瑞芝亭碑出於牽強不成文過承推獎但增愧耳顧字  
大難為石若用一石四圍刻之如顏魯公東方朔畫贊  
之類亦佳蓋數十年來碑刻大槩有俗氣稍令近古為  
望

專人辱賜書勤懇感慰無量春氣寒燠未節不審體力  
何如伏想平易之政近民鰥寡得職縣齋閒虛頗以講

卷十八  
學之功作興田里之秀使畎畝之間知有孝友忠信以  
効瑞草之實乎某待盡墓次生理無幾頗亦疲於賓客  
勞問作記承動靜不能萬一不次

與運使中舍書五

某再拜啟比因急促還上狀當已通徹几下專介至伏  
奉手誨勤懇審外臺澄清會府肅靜尊候萬福良慰懷  
仰某比苦頭眩不美飲食尚留田里數日間當謀趨拜  
節下謹奉狀不能萬一不次

某十三日受敕管勾亳州明道宮并得堂劄已除范祖禹提舉明道宮奉聖旨各於開封界居住報應國史院取會文字亦能釋時解意旨且泛舟邈迤向淮南耳二舟告指揮速改文字給付數日間別上狀

去月發南康日託正輔上狀當已徹几下天氣小冷不審比來尊候何如總領諸司事務雖勤調護惟從事於道者能不倦爾令嗣數得音問子舍進學有日新之功

正輔攜去新漁父篇嘗經匠者一按之否方遠瞻承臨  
書懷仰謹勒手狀

自頃欲去雙井謂數日可參對故因不為書既至海昏  
平生所聞雲居山川勝絕而未嘗到遂勇為一往輒留  
半月餘山中孤寂非復人間以是闕於修敬伏蒙賜書  
存問曲折感慰無量失宣城得武昌消息盈虛誠如尊  
諭三二日即伏賓次謹勒手狀

令嗣比數相見清重修潔甚可愛也釣絲竹筍大為珍

惠瓜匏瑣瑣尤覺此物於匕筯間有精采也惟清道人  
在雲居養道深粹不間親疎恨公未識之耳

與平仲少府書

某頓首自平仲南還恨在城中之日淺又不肖以客事  
未得休息未得從容求益論也先蒙惠書勤懇千萬甚  
慰懷仰之情借示仲車先生簡尺重仁疊義可想見其  
風流也適有賓客集菴中來人督書修問極草草暄暖  
千萬為道自重

暄暖不審何如太夫人安此風土尊候輕健否饋酒何煩如此公自奉甘旨無餘承乏殊悚仄也仲車先生草草簡尺皆有教戒此所謂有德必有言也

審仲車先生棄士大夫不起於山陽窮居失所又不幸至此直使人哀痛也然仲車好德樂義不屈其身以至耄老好學不倦以至於盡在先生無憾矣公父子相知深念哀其身後計士大夫亦須有動心者焉某自八月大病幾至委頓比三四日方食而知饑知味未能復常

也留來使三日候書倦甚不能成煎迫求去扶病就此  
天下事權之以義重輕有所屈有所伸足下強飲強食  
為太夫人自壽而已

辱書常以公銜將之閒居每從公家借書史重煩遂不  
能作牋上答不能無悚惕也荷存問勤懇教告重複知  
公非苟然者感刻感刻惠示新文亦知效官窮僻憔悴  
於百寮之下而養直剛大自申於萬夫之上古人所謂  
丹徒布衣者慷慨未可量也欽歎欽歎未有會集之期

何勝引領千萬為道自重

喻諉之篇論勢利二客由徑而入排斥義命二友其意甚美然制作之體似未盡善也某嘗論古人戲作之文惟揚子雲解嘲韓退之進學解乃為盡善如孟堅賓戲崔駰達旨已費辭而理不足不審以為如何

右皆家傳

與徐尉思齊書

某頓首到城雖得一參候而屢屈軒蓋常恨客眾不得從容相語奉別忽七八日見所與伯氏書審比來日用



輕安良慰懷想遺杖漫煩求之乃承垂意搜索必獲又以公移將之禮數過當悚惕短頌戲奉一笑可與仰山崇勝觀之澀雨不晴意思昏鈍奉狀草率四月初

七也

紫竹拄杖頌  
載第二卷

山谷別集卷十八

欽定四庫全書

山谷別集卷十九

宋 黃庭堅 撰

書簡

與明叔少府書十七

某再拜啓待罪窮堅與魑魅為鄰平生學問亦以老病  
昏塞既無書史可備檢尋又無朋友相與琢磨直一談  
一笑流俗相看耳忽蒙賜書存問勤懇且承安貧樂義

不溷鄉黨賣屋以為道塗之資載書以為到官之業想見風采定慰人心國有君子何陋之有不肖早衰五十而無聞使得中壽日月餘幾得好學之士相從尚或有所發明望風欽歎無以為喻謹奉狀道願見之意心之精微非筆墨所及伏惟照察謹狀

某頓首比承來官此邦交印有日竊喜草木臭味不遠遂得以文字相娛而不知先大夫與亡叔給事又有同年之契伏奉誨音實深悲慰流落窮山惟欲屏伏所謂

面目可憎語言無味者乃得以君子為依可以忘羈旅  
矣守倅皆京洛人好事尚文不易得也道中若得暇各  
作一書到日投之亦佳但論孤官寡助得高明慈惠之  
師長以為依歸可以盡心於職事竊其餘光溫尋舊學  
之意其文章波瀾翻頭作尾自繫之大筆矣或不暇及  
且杼軸之到後數日亦可此邦氣味適可用此藥耳恐  
左右或未諳也

某拜手累日隔面惟有懷想伏奉手誨審起居輕安為

慰承上司擇才付以文柄甚善矧公宵中坦夷臨事不苟又去科場未久當此任甚宜試院所欲知者一曰公二曰密三曰敬四曰通公則請託不行密則訟源塞敬則士心服通則盡人所長某頃凡七作試官凡考試中恠事未嘗有也醫不三世不服其藥老者之智壯者之決也故謾及之以嫌不欲往見千萬珍厚行李或有所關示諭范公及知命皆致問千萬蒙齒記甚惠無緣參詣願已事早還重陽後日日望挈音矣

某再拜窮山寂寞方得君子相依甚慰恨相見未款耳  
伏辱手誨喜承經宿體力輕安寵惠先大夫瀘川集幸  
甚幸甚竊思江安公以鸞鳳之羽辱在泥塗懷文而抱  
質不幸蚤世可為實涕自非身後有人綜緝遺文幾不  
失墜伏讀數篇實以聳歎未遑尋繹翰墨之餘味也謹  
當奉以巾几勝日一開以辭思遺老敬具手啓上謝萬  
一不陳昨日亦見太守說四井堂詩然瀘州不見寄也  
事出謝康樂擬魏太子鄴中集序今檢呈韋蘇州詩若

不看且檢示

二難前輩以為亦只用擬魏太子詩序中云楚襄王時有宋玉唐景梁孝王時有鄒枚嚴馬游者美矣而其主不文漢武帝徐樂諸才備應對之能而雄猜多忌豈獲晤言之對并得此二難遭之時耳某疑滕王閣會集主人有兄弟俱是顯人耳四井堂詩豈有難作之理王勃秋日宴滕王閣詩序亦云四美具二難并曾見此文否昨晚自江瀕歸見一病人臥王道亨籬外石上恐其即



凍死令人扶持到寺門與粥藥問得乃是雙井旁小戶  
自荆南受雇為南雄州客鄧四郎馬二郎擔重擔子來  
至此見渠病遂抑令押辭退狀棄下馬鄧二客見在北  
門外大店安下還可指揮弓手問此二人責令收養此  
病夫否或不欲自行即欲縣中投一勾幹人狀并乞責  
人取口詞耳

某頓首經宿伏想寢膳安宜試更追韻作二頌此亦曩  
時得之聖俞東坡之斧斤耳欲知文章奪其關鍵而自

為主出其無窮如此也縣中訟田者已得情否得閑幸  
獲過此閒談歲月亦可惜忽然解官去矣欲約數人來  
了却竹籬得一位直差了事者來此亦令一二人同領  
護之與飯與酒令一日畢工耳籬竹少十數擔試為令  
江頭旋買可得否今日晴暖令人請東玉來會棊可得  
眼皮開也

師敏通於吏道與同邑殊可樂人情未必一一合契要  
之異而同同而異歸於不為吏所賣而實惠及民者於

其中不必快快也守倅清重事雖少稽緩比他日不猶  
愈乎鼎臣極可愛凡事不雕琢而畏法勤官可數與游  
也子畏雖似有城府亦審慎可喜勿作耿耿男子酒後  
失言何所不至一洗滌之使胷中蕩然與一切人無芥  
蒂此學問之意也未有合并之期千萬珍重

辱手筆審安勝為慰屬聞冒風冷小不佳喜遂平安所  
錄拙詩是也但訛數字今錄一本去桐帽本蜀人作以  
桐木作而漆之如今之帽三十年前猶見之棕鞋本出

蜀中今南叢林皆作蓋野夫黃冠之意食笋詩已是元  
豐間作若見子瞻詩猶可用其韻省憶耳早間無事可  
來此遂同範公所齋粥也令姪想勤學勝裕時攜所讀  
過此乃佳士知自守而勤書者難得然須聞古人言行  
旨趣乃不虛用功耳須不隨慕合來乃可也昨來過石  
駝橋見鋪橋面極不如法直木皆藏旁近人家而用舊  
橋面朽木鋪襯一有土則無從點檢經大雨又當壞公  
及東玉可那工夫親臨之不躬不親衆民不信不其然

乎

比承動靜行李涉險來歸閑居亦匆匆未能遣記辱手  
誨審衝冒小失調護伏想休息得所已輕安矣適有少  
急事袞袞至夜不果奉答鄙文編已領略一篇不踳駁  
還多二十年前文字也前所借編今送吉聞公在告以  
避武隆檢覆意不必爾仕宦勞逸常相半如祖公七茅  
但朝暮辨耳人生與憂患俱生仕宦則與勞苦同處事  
固多藏於隱伏實無可避願深思之食其祿而避事則

災怪生矣

某頓首早辱教答知君子用心所向不謬適得手誨承  
已參告受檄即行慰喜無量所謂見善如不及見不善  
如探湯吾聞其語又見其人也水次晨暮極冷千萬珍  
重穹九漫納

累日不奉緒言惟有懷仰辱手誨承體力輕安惠佳果  
感刻感刻所問循吏傳治行言其治迹耳召信臣治行  
當為天下第一是也序言河南守吳公蜀守文翁皆謹

身率先居以廉平又言孝宣時拜刺史宰相皆引問觀其所由退而考察其所行以質其言此亦治行之意也累辱手誨并送山楨極荷勤懇不肖自視缺然每承君子有相濟用之意顧亦何所堪惟忠厚不懈欲以風示流俗則可爾既辱相傾蓋則俗禮紛紛走人門者何足道哉幸可無疑也舍弟又辱彘肩之賜何必爾耶以宿昔眼痛作不能書未果作謝啓願裁察

本紙用此八幅寫和晁張八篇昨日已書小卷中今輒

作王維摩詰八詩蓋蜀中士大夫罕誦此作故書往貴人稍尋討耳承今日遂成行早起太守來約同飯遂得安詔款語矣聞昨頗以公厨不餽煩料理尋已豁然柳下惠與鄉人處袒裼裸裎而不屑蓋其胸中視一世人特鳴吠耳又何足與之論輕重厚薄邪仰觀青天行白雲萬事不置非公高明語不及此

比來伏想氣體殊佳別時具道治心養氣外物不能入於靈府當已見功如小人觸忤上則送州下則送縣勿



親行罰似為於義於法皆中節耳清河君始聞有長者  
能為容悅而行諫其間使上官不睦則以濟其貪鄙幸  
熟察之熨道老成好學之士也韓掾雖少年蠶氣然自  
修其職事雖嚴無害廖鐸蔡相時召置坐末亦可喜  
篆文平時惟書大如手者乃得意既作此大字不甚工  
又講義堂字太醇拙他日得暇當別寫此三字奉寄雅  
字古之大疋小疋如此書臺字乃城臺也郭公本出於  
號乃從作郭耳

與黃斌老書帖八

某惶恐再拜涉夏草木深山川風露瘴癘所潛伏伏惟  
使節衝冒良亦勞勤即日不審營從所止尊候何如下  
車伊邇仁厚之風先被於夷夏願篤行李以慰喁喁謹  
附承動靜區區萬一不陳

某名在不赦之籍長為明時棄物胥䟽隱約蓬蒿之下  
直偷生耳已無冠帶可從人間禮數但有幅巾直裰俯  
仰間巷間不可以參謁使車之道左請問舍人記室惟

想望英風凜然竦平生願見之心耳竊惟盛德可以存  
而不論言語複重蓋老病之常態霄瀆清重悚仄無地  
黃某啓窮巷杜門乃辱軒旆臨之獲聞高明卓絕之論  
一洗耳目之塵開慰孤陋無以為喻雨餘朝涼不審尊  
候何如伏惟游及所經民受其賜足以銷伏災沴之氣  
明神鑒之百祥所集衰病無階進謁將命謹勒手狀謝  
萬一皇恐皇恐

窮巷杜門非長者之所宜辱乃蒙屈臨問慰孤陋敬佩

嘉德無以為喻某獲聞餘論實慰從來高山仰止之心  
又以自得旦來不審尊候何如伏惟游及有餘不至勞  
勤幅巾直裰不可以上謁賓次謹勒手狀謝不敏伏惟  
照察謹狀

比承考績進官官吏受仁明之賜者皆欣欣不肖益不  
敢以田冠野服謁賀門下乃蒙降屈修禮於蓬華小人  
實自不皇於今恐悚旦來不審尊候何如伏惟神明相  
助日用輕安所須二方并芎藭丸納上理中丸却乞三

數粒謹勒手狀

前日過蒙旌麾屈顧敬佩嘉德雨寒不審起居何如春  
蔬似可侑酒謾往五種食芹炙背野人之意則勤但恐  
三驚七蕘君子之腹屬厭矣

天高不雨神龍深潛於蘇波似以為郡中無求於我也  
暑氣煩甚不審起居何如園中下簞苦筴欲求三十許  
枝喧瀆恐悚恐悚

昨日過蒙延禮甚愧勤主人其奉勝談觀奇畫亦忘終

日煩倦也旦來不審起居何如張園小石刻今日方畢  
工謾往一本筆數種各獻兩枝恐有堪作竹者耳如昨  
所用張生舊筆幸惠示欲作十數書新筆多即不如人  
意故也蘇波谿取水得斌老自作一文道憂歲憂民之  
意或可感通耳

蚤來蒙手答勤重感刻感刻伏奉簡畢喜承今日寢膳  
寧嘉惠示祭蘇波文字詞旨惻怛益足以感幽潛歛歎  
欽歎所諭作郡守名衡義當如此篇末欲更數字具別

紙不審可否塞紅門事雖不得其曲折恐如罷探報百  
餘員及放散珍禽異獸之類但一事皆德政也右皆得  
之於其  
家

與南康使君察院書二

某再拜某罪逆餘生苟活未死日月川流既見素冠追  
慕不逮哀痛無已頃者使車方承詔而西蒙疏累紙存  
問慰卹恩意甚厚實深哀感方以竭力大事又治給事  
叔父寃宥故不能即寓疏罪負無可言者比聞使節當

來惠江西尚冀得一參展謹勒手狀

某再拜頃者君在言路竊念忠言嘉謨日補衮職以雨露四方何去國亟耶南康下車即聞田里皆受賜少淹留使節以庇江西桑梓之邦實依喬雲之蔭顧恐即還朝耳近見李子修大夫已請宮觀若遂請瞻對有期也

與敎禮祕校帖五

某頓首昨日幸一參候古器與山川之恆產參然滿前可以清暑此物輩殊勝用心於博奕也然要須以強學



力行守之所謂德之休明雖小重也不審今治何經讀何種史書參其義味有日新之功否惠貺珍器敬佩服嘉德竹表甕裏茶盃極佳恨未有天生佳瓢稱之耳米元章書率爾題卷末令親齋郎安勝貌古氣深穩似有學古之質甚可喜也

辱手畢喜承日用輕安示諭讀書甚喜然須深探其義味使不為誦古人之空文乃有益也班固漢書最好讀然須依卷帙先後字字讀過久之使一代事參錯在胸

中便為不負班固耳周子發書亂寫置卷尾下成字也  
天氣熱揮汗不給諸畫及止止軒字未暇寫去承佳篇  
須蜀紙今送三百此乃自令浣花王家作者生瓢承見  
惠亦好但恨折時太嫩相茶瓢與相叩竹同法不欲肥  
而欲瘦但須飽霜露耳

筇竹戎州用煎茶然久之節斷如截以此絕不攜來人  
年四十後漸可扶杖足下少年也親在堂而欲扶杖恐  
非禮意欲尋一龜殼佳者截取近尾二寸餘治淨其近

髮處開橫竅為簪道似佳能為尋一匏筒佳者為之乎  
辱手畢喜承朝來起居不爽調護寵惠筆墨及紙皆珍  
品感刻感刻切觀才器英特可以盡心於古人遠大之  
業閉門讀書求心求己漬潤以古人義味深沈重厚謝  
去少年戲弄之習以副父兄之願豈不美哉屢承羞餽  
未有佳物奉答輒以藥石之言為報伏幸裁察

此承軒蓋絕不出甚善甚善閒齋清淨古器羅列左右  
思古人不得見誦其書深求其義味則油然仁義之氣

生於胷中慮談而其樂長豈與頻頻之黨喧闐作無義語之樂可同日哉惠示砧研物材頗精似亦不甚使用蓋磨墨之地不廣則難得墨潘多置水則溢四旁非良器也少留此銘其臀乃遣迴某有大烏石研制作甚適用或要觀可遣四人并小扛牀來取之

答晦夫衡州使君書二

某頓首啟頃蒙賜書并寄惠食器巫山君尋即致來極濟所乏又辱寓遞所賜書有問勤懇策以所不至仰佩

恩親之至不能已已某潛伏林間踈遠人事惟蓬蒿之  
不密是以缺然久不通書想晦夫和易多可又相愛必  
能相寬耳雖聞已拜衡州之命不知闕在幾時得孔毅  
父書問否即日里中宴居何以為樂頗能留意子弟學  
問否子童已赴任未登高臨遠未嘗不懷笑語千萬珍  
重以須進擢謹勒手狀

望之去後想令弟必將沂國入城其人亦肯調伏成家  
否諸子弟有從學之所否人生須輟生事之半養一佳

士教子弟為十年之計乃有可望求得佳士既資其衣食溫飽又當尊敬之久而不勸乃可以盡君子之心而享其功每見士大夫家養門客略與僕使同耳如此何緣得佳士蓺麻必不能為粟也向見令嗣眉目明秀但患未得師友耳厲之人夜半而生子求火甚急唯恐其似已也况長者乎無緣會面聊寄一笑

與滎州薛使君書三

某頓首再拜滎州使君承議閣下某既發戎州舟次得

所惠教恩意千萬感服無以為喻即日寒澀不審尊候  
何如伏惟豈弟之政近民民以悅服庭無留事齋中嘗  
有尊俎之樂寢食之味神所相勞無階參敬惟有懷仰  
伏祈為國為民自珍玉體謹勒手狀

承長者以才術之美嘗入叔父給事心鏡恨未相識也  
叔父忠義孝友在今士大夫間千人之一也方得立獻  
納之地不幸蚤世因垂諭不勝實涕

貴州士人惟周彥衣冠之領袖也其人深中篤厚雖中

州不易得也其兄莊叔老於世事亦不可得紫衣僧祖元亦周彥之族兄抱琴種竹有瀟洒之趣以星厯推休咎常得十之七八試問之可知也

與王周彥書三

某久為病苦養成疏簡經歲靜坐性復神存為日已深自有見處回觀昔日舉動皆非更視人間誠為可笑凡人性各有妙用也一得其妙則通深遠到無所不明前世君子所恃以為樂也且天地萬物之美人之所恃為



尊榮富樂者皆可空也。不足有而人之妄勝也。妄滅則真存存而後知其不足有也。經所載皆有聖人修行之說而世所不察專以富貴為樂則人亦止此而已矣。非周彥亦不語此。公案幸心會而默識之。復見某之言為贅也。

某頓首啓。辱手書勤懇并寄詩文意氣駸駸翼翼出門已無萬里。古人所謂斷以不疑鬼神避之如公筆力他日孰能當之。往在元祐初始與秦少游張文潛論詩二

公初不謂然久之東坡先生以為一代之詩當推魯直而二公遂舍其舊而圖新方其改轍易轍如枯絃做軫雖成聲而踈濶跌宕不滿人耳少焉遂能使師曠忘味鐘期改容也如足下之作深之以經術之義味弘之以史氏之品藻合之以作者之規矩不但使兩川之豪士拱手也未即得面馳情無量秋初能一來快盡此事謹勒手狀

某前承問讀易常苦匆匆不能盡所欲言者若欲章分

句解作書生伎倆不過熟讀繫辭便可得作者旨趣矣  
此極不難但要成誦令章句瑩然在胸中耳若欲知易  
之道則但於百姓日用而不知一句能直下冰銷瓦解  
斯盡之矣如此句諸佛祖師亦滿口舉不盡也三十年  
來心醉易中自從解此一句遂不疑老聃釋氏許多文  
字但就自己求之

與楊素翁書二

某頓首辱書勤懇感慰亡量送紫竹書厨雖未甚中度

然亦適用知公眷卹不倦也送軸甚佳感刻感刻秋高  
霜冷即日起居何如想里中亦有可人共黃花一樽破  
顏而笑所須寫老杜詩青衣城中晝日盡為賓客所奪  
夜燈不便老眼且遣此三人回舟中寫得隨處奉寄必  
不貽人笑恠也某十五六間必解舟相距密邇猶得時  
奉書也對酒作書極不如禮

到青神所得士唯王十六元直老成有士大夫氣味嚴  
與公權學識高明文章詞氣道理明白粹美此國士也

蘇元老在庭作詩書字真東坡先生家子弟人物亦高  
秀聞其平居甚孝謹不易得也不知素翁嘗與此三人  
游否公俠士也故以奉告

右皆  
家傳

與楊子建秀才書

某頓首頃幸得接款曲而賓客全集應接常無餘日不  
能叩學問之自得處曷勝耿耿冬候暄暖即日想起居  
輕安通神論佳作也略能遍讀非潛心之地故倉猝不  
能得其義味作序如此不審可意否方此睽遠千萬珍

重謹勒手狀某再拜

通神論序  
載第三卷

山谷別集卷十九

欽定四庫全書

山谷別集卷二十

宋 黃庭堅 撰

書簡

與劉莘老帖二

某再拜啓不侍累日思承教音無日不動伏奉簡誨審  
體力勝健為慰承諭劉君清修如此固願識之信公語  
錄暫留徧觀若欲作序引不敢辭但恐不足以重之耳

七日後當投休告參候謹上狀

自公撫南牀士論翕然每與深識者共歎仰也詩云不  
懈于位民之攸暨伏惟監於湯之盤銘不以職事舉修  
名立而倦也率易恐悚

與劉斯立帖

某頓首相聞而願見略已十五年邂逅得面瞻想風度  
實過所聞辱手誨并得佳句伏讀未造微妙他日到北  
窓當吟詠以為陶冶之具方出局罷甚所要文字未能



檢尋自此當嗣音也

與翊道通判書三

某再拜上仲春尚暄不審尊候何如伏惟監理暇豫寢膳宴安山川表裏言論風旨若可與聞而囚拘有所無階瞻敬惟有馳情頃蒙賜書存問勤篤忘其在罪籍而推與過情棄捐漂沒當老於蠻夷中幸瘴癘不甚族人養生之具不甚闕便足了一生矣多病早衰頭眩足弱幾絕人事又林下水濱習成嬾放以是久不能通記下

執事竊謂高明敦厚何所不容照其情實知非簡耳黔  
中春寒異常不知夔府一見雪否伏冀善自調護以安  
百祿謹勒手狀

某再拜去歲所蒙乃公狀以閒居務省事不欲數慫公  
家借書吏以是久不能上答竊惟高明所以見期蓋不  
在此苛禮故輒闕焉由流俗觀之不勝其罪也頃蒙惠  
蜀糖殊佳山中既難得又蔬食所須耳感刻感刻雙井  
少許漫往助勝日嘉客對江山治之之法茂宗當能道

之表第周掾嘗荷顧盼不肖與受賜也舍弟知命蒙存  
記甚厚適以病目方小愈未能上狀

夔府故號為少事又漕臺所在吏治有不安易為諮稟  
喬年大夫以寬厚治郡而公以餘閒糾撻吏曹之逋慢  
伏想宴閒之日蓋多江山佳麗從容尊俎之樂宜不乏  
張茂年少解事相得甚歡聞上司又辟南浦尉張永弼  
作帳局亦佳士也同府多得佳士亦可樂耳

與李端中書二

尊公修撰不敢通書恐罪人之垢玷汙大旆之光輝前  
日蒙賜酒肴以尊者之賜熟計念之不敢辭亦恐或累  
盛德此後願勿繼也悚惕悚惕

昨蒙賜教勤懇并貺建溪珍品敬佩不忘之意即日霜  
寒不審尊候何如伏惟忠厚樂易風行草偃尊俎笑談  
自得江山之助承誨諭欲求閒冷何不自憲耶督迫上  
供處處如此公方富於春秋求閒恐不能無嫌也未有  
瞻承之便臨書懷仰伏祈為民自重長使鰥寡得職

與之美運使書

某再拜使車雖數遷然敦厚庸敏民所望而畏愛也伏  
惟按部所止高明斂手悻獨得職寢食之味神所相勞  
令嗣猶在婦翁家邪君禮想視膳問寢不解子職居閒  
亦得文字之樂某漂寓鄂渚家二十口亦隨緣厚薄但  
湖北極苦旱乾不免有饑饉之憂耳不審貴部夏秋頗  
得時雨否

與子智帖二

某頓首辱書稱述曲折此一面可道而若致千里之音者何耶老人病嬾了不喜作書此曹獫狁故不能一二上答所與勾主簿書文詞意氣甚壯然既稱鄉丈而曰某白非少者事長之禮也古無尊卑皆稱人曰足下致敬其足此極數也故范曄謂秦王曰大王足下酈食其謂漢王曰足下必欲誅無道秦不宜踞見長者然後世既稱陛下殿下閣下執事則以足下施於下交則不得不從衆也足下方有求於勾主簿而曰某白足下猶欲

入而閉門也而可乎

熟觀所惠書詞意高雅有作者之風足下誠勤篤不忘  
探經術以致其深考史傳以致其博雖觀先王之言而  
以事明之古人不難到也燕默傳甚有思致他日不已  
安知足下不為二班耶但願勿求小成自足耳

與胡少汲書

某春末得莊僕迴所惠書即附慰疏問唐臣寔遠近  
及念九兄弟處喪何如學問可望否張氏女得所否何

以書至今未達耶計是奉新莊夫非有所調發不往故直留前書在村舍爾足下手足之痛相及在體於人情豈能堪然當以承祭祀為重以道印煩惱為智慧之用知其兒女痛痒則不孤兄弟所以相期者矣惠寄蘄簞由拳背山中所闕多感多感參前堂蓋取所謂立則見其參於前耳此處有前後堂前堂面竹竹外修溪修溪以南幕阜山重疊無際後堂北桃李皆數十尺盛夏綠陰甚可愛二甥誤傳堂意致公佳作失經旨所謂使陳



壽不美於史遷固之罪也諸詩皆有勝處知別後不忘  
學欽仰欽仰所須伯夷廟碑及近文以盛暑揮汗作書  
不復可及此物秋涼後或得手抄數篇也

與載熙書

某頓首前辱載熙書勤重累紙并手作珍墨煤細質堅  
色黝黑幾兼前輩之妙不獨今士大夫好事之比也欽  
重欽重又惠京師名筆皆佳感刻多事加之老嬾未能  
作答又辱簡記存問不怠何欣慰如之錄示東坡諸語

所欲聞也封示象州詩書信讀之惕然又仰才叔之慈仁也承新任乃在邕州他日可數通書并為海物之主人也未有會面之期千萬珍重紙二軸久留此嬾寫因來人告行謾書畢不能佳也奉字伯仲謾作短序道之衰朽不成文也公筆札極豪勁但未入古人繩墨何也古人雖顛倒書亦四停八當凡書字偏枯皆不成字所謂失一點如美人眇一目失一戈如壯士折一臂不審信之否

與王元直帖

某頓首今旦以楊咸儒煎迫欲行不舉頭鴈六七書僅能至食時而畢故輒戒門吏使勿通賓謁不謂諸君子旦來皆見過也悚惕悚惕辱手畢喜承日用安和買絹買米皆煩調護感刻感刻每承諸賢見目以釣台甚不安也凡名皆須宜稱耳若常行唯執政可呼釣候釣旨兩制及大兩省三獨坐可呼台候台旨如司諫正言三院御史修撰直閣大卿監皆不呼台候台旨也因見諸

公為道此皆改之孔子所謂君子名之必可言也不爾不唯不肖得罪諸賢亦不免為識者所譏笑耳

答夢得承制書

又辱遠寄二詩白髮瘴霧之中不忘筆研實增愛歎春溪茗菜日佳想甚助吟諷之味無緣瞻奉千萬珍重賢郎安勝想山中閒寂極得讀書之味

與叔元帖

某再拜昨幸過仁者之里得見隱居之清勝使人有蟬

蛻塵埃之意然迎來將往辱軒蓋甚勤愧不可言也專  
人奉賜教勤甚悚惕比來日用輕安賢郎進學不怠良  
慰懷仰園亭詩道中忽忽未能就他日可寄也堂室榜  
寫去奉新縣二鼓驛舍中有滴堦雨燭下眼花奉狀如  
此

答蕭子孝書

與足下先君子游於今三十年常恨濟父不見用於時  
又愧錄錄隨食南北不如濟父一丘一壑便足了一生

也比辱以先君子之治命見囑作銘方此銜哀墓次待  
盡朝夕何得復有文思又承寔宥有期不敢但已以孤  
泉下之願率爾就此不知可以傳後否試持與君表議  
之可用即摹刻也哀情憤憤書不倫次

右見蕭  
氏石刻

與死心道人書三

某再拜雲巖和尚禪几往日常蒙苦口提撕常如醉夢  
依稀在光影中今日昭然明日昧然蓋疑情不盡命根  
不斷故望涯而退耳謫官在黔州道中晝臥覺來忽然

廓爾尋思平生被天下老和尚謾了多少惟有死心道人  
不相背乃是第一慈悲亦有無諍寮中三十拄杖因  
書馳送與佳在彼否此兩道人却須要打剥淨未審如  
何清公到高居計無不安穩亦頗為衲子追逐耶然已  
是名滿天下恐終不得閒耳堯率照公是箇本色住山  
久與游居亦好興却是叢林中淹浸得到只是從初悟  
發處不曾廓然豁爾故不能得成一片見今只管學決  
擇佛法收拾一副當打老鼠家具向後為人耳須是本

分宗打罵教煩惱半年十箇月他日未可量須是有香  
巖稜道者器宇始得不知此論是否因書幸見教也戴  
道純今在甚處昨在黃龍相聚數日亦是學得說禪儘  
似也只今道衆中有是道器者否馮大郎信心如此雲  
巖緣事想不難成就也

奉所賜書承已退翠巖寄住祐聖氣力安樂良慰懷想  
今夏居處亦有水濱林下可逍遙者乎公脊骨硬如鐵  
去住自由今天下道人中一人而已嘗觀漢之宰相朝



握天下之權暮駕柴車出丞相府自處之適爾旁觀者亦不為難而今之住山者嘗抱而不忍脫此何理也

某自分寧過萍鄉般取知命一房同赴太平道出奉新甚願一見更聞師子吼音震驚癡鈍適俗緣有不得去但相望雲煙之外增歎息耳謹勒手狀

答浯溪長老新公書

某拜手專人辱書勤懇并惠送季康篆元中丞浯溪銘筆意甚佳以字法觀之岵臺銘亦季康篆也然猶有素

滋篆唐亭銘三十六行何不墨本見惠宣閩體也袁滋  
唐相也他處未嘗見篆文此獨有之可貴也凡唐亭之  
東崖石上刻次山文合袁滋季康篆共七十一行為崖  
溜簷水所敗當日不如一日矣若費三十竿大竹作厦  
更以吞槽走簷水其下開掘沙土見崖令走水快亦使  
素公房地乾潔祐院門免時有聒噪也此事切希掛意  
莊客人力得工夫時可令仲純仲侏輩將領三兩人治  
橋左右溪道令雅潔疊石令橋下亦可作道人四威儀

處他日院門當成次第若得蒙恩北歸奉為盡換內外  
牌榜也兩三日既驟熱又賓客紛紛寫大字未得來人  
煎迫求歸故且遣回諸人相見皆為致千萬意

答崇勝密老書

頃嘗論道人處俗之意公欣然見納然恐未極其趣耳  
如公高明了了決不同流俗矣憂患百種去來無鄉要  
使虎無所措其爪兵無所容其刃耳勢利之交決定能  
埋沒人人之所畏不可不畏清心省事不得已而後應

自然寡過矣道人壁立千仞方不入俗至於和光同塵  
又和本折却與其和本折却不如壁立千仞

右皆  
家傳

雜簡四

某頓首去年失秦少游又失東坡蘇公今年又失陳履  
常余意文星已宵墜矣然幸此三君子者皆有佳兒未  
死猶待其蘄然見頭角爾見東坡祭文多佳語歛歎歛  
歎至太平且遣人往祭之今年多病眩不能作文又思  
如東坡輩人不可草草下筆故也某行李之詳已具初

和甫書中矣

經宿不審體力輕安否早來覺兩日不快乃是前時怒庖人烹調不如法因而就食故氣上而煩則知喜怒之害人深矣夾公服奉煩願旨令慰過針線工治衣服大率不能令衣平展耳

右真蹟藏于趙宗玉家

今日祭社一歲民食所託所以祈風雨時節為民禳除螽賊之災不謂兩勸農使者皆移疾不親之也孔子曰吾不與祭如不祭神聰明正直依人而行不可忽也昨

日不甚解所謂故不果論之他日有典祀願少留意公  
嘗事韓康公嘗見此公齋祭風範否俸米極荷應副得  
無乏他庫支遣否

某頓首承示論數往助崇德姨母此益公孝友之素仕  
宦所得唯此而已其餘亦何足道耶願數顧省立則參  
於前在輿則倚於衡也

右真蹟藏于  
晉陵尤氏


與才卿法曹仁弟書

某頓首辱書審侍奉到官吉慶為慰八姑頗樂彼風物

否閤中諸幼想皆安勝知太守頗垂顧恨遂被召耳新  
守亦故舊俟到即作書往然初仕極須事事盡心竭力  
與同僚親睦勿分彼我職事略可相通者任其勞則同  
僚歸心矣官所尤謹買物虧價及寺院民家借器用及  
出入不明能謹此數事則亦易得舉主稍用他人一秋  
毫之力可致矣未緣會面臨書懷想千萬勤官為親自

重

右家藏  
真蹟



山谷別集卷二十